

四庫全書

集部

欽定四庫全書

集部

雲溪居士集卷二十五
六

詳校官庶吉士臣吳烜

侍讀臣孫球覆勘

謄錄監生臣陳 祁

謄錄監生臣沈 霽

欽定四庫全書

雲溪居士集卷三十五

宋 華鎮 撰

啟 三十六首

賀新先輩二啟

右某啟伏審丕奉溫文進登榮任潔名科而肯顧稱熙
世之旁求有識所聞與時共慶新恩先輩秘校極淵源
而道學慎坊表以檢身周旋允迪于中庸博洽妙窮于
蘊奧顧佚遺而彌久果薦擢以推先若綬青青慶鴻儀

之有漸脩途坦坦須驥足之無前某早叨高閎夙承善
誘漂泊三湘之遠追隨五斗之微陪夏燕以何緣跋桃
蹊而第切

右某啟伏以日月光華會千齡之聖且雷雨作解捷三
級之龍門擢桂林之一枝振鵬圖于萬里必有國士取
先世資伏惟新恩先輩品冠月評文深霧采極淵源而
道學富藻色以摛華顯從秀異之名榮綴英雄之毅天
高氣爽甚欣一鶚之飛風急星馳更沐五雲之貺感銘

增切叙致奚殫

賀宮使觀文相公啟

右某啟伏以解劇師垣承華道館煥優賢之異數敷逸
老之豐規凡沐埏鎔敷同欣仰宮使觀文相公道光前
哲望聳當朝由仁義以濟時緣儒雅以飭事表儀百辟
鎮撫四方茂德齒以兼崇濟功名而並峻言為不苟進
退有儀懇辭機政之隆出奠藩維之重清風益遠素志
彌高顧仗節以猶繁想安車而就逸琳宮錫羨暫申和

九二十五
理之休玉鉉調元終謝老成之用某夙塵陶冶逃間門
牆繫想增勤欣榮第切

謝解啟

右某啟蟠木誰容始愧輪囷之醜大匠無棄卒收尋尺
之長旋自省循益懷矜惕竊以太常奏籍必登秀異之
倫鄉老獻書務極賢能之選惟是辨論之重實干治忽
之幾振古所嚴盛時惟甚國家聲猷累洽俊乂克生鄒
魯萬邦唐虞七世異人並出有光西漢之隆多士以寧

益邁岐周之盛穆穆盡可封之俗鏘鏘皆入彀之英式
新詔條用精士選申重登高之賦遵明載道之經根本
藝文英華音律金聲玉振不容繡悅之迂雷發雲興詎
溺雕蟲之小家受菁莪之育人成翹楚之奇馳騫儒林
畊鋤道術揆卿雲之麗藻挹姬孔之淳源掄材鄧林自
盡榷柟之美閱馬燕市前多驂駮之良允惟俊人乃稱
公選如某者潛心往哲述業晚生步雖歷於藩籬識未
通于堂奧非謝家之蘭玉乏言偃之淵源一日未忘三

餘自勵奉過庭之訓雖夙聞于義方撫滿籛之金尚有
慙于世業曩齒上庠之列獲參造士之聯愧擢秀于郟
枝輒頽翎于陶夢惟齒髮之尚少撫志氣以方剛會逢
鳧藻之期恥作鱸蓴之客欣聞丹詔載曳長裾效主鴈
之能鳴冀囊錐之穎脫桑林合舞雖操游刃之餘牧野
誓師尚憚如林之旅致茲忝冒粵有黃緣斯蓋伏遇某
官先生識量恢闓德明昭晰藻色士類翌贊帝猷鳴律
吹噓不間鄒生之黍運斤翦拂兼容匠石之樗爰俾散

材獲先方物某敢不日新學殖時味道腴銳朝氣以無
前見大敵而鼓勇當年鍛翮雖已愧於一飛今日焚舟
誓圖成于再戰庶無忝辱少答恩私

謝解啟

右某啟今月十八日伏覩解榜叨預薦名者文闡較藝
幸無罷黜之羞士籍聯名僅預甄揚之列循涯知愧撫
已自慙竊以兩漢得人皆本孝廉之舉三代取士必因
州里之書故為善於家者方見任于朝而未優于學者

不敢進于仕賢能之選既廢言語之科聿興摛華多畫
餅之言論道鮮成章之業非慎妍媸之鑑難忘菽麥之
昏操衡石之權者苟無至當之歸事枝葉之辭者誰是
不刊之論所以珉玉並進駑驥爭馳決先衆人豈必八
龍之秀沈居下列能無一鶚之才若某者幼承義方長
被明訓棄箕裘之緒業玩竹帛之遺文雖無三篋之奇
常冀五車之博黃卷相對幾忘寒暑之遷擔石無儲不
起紛華之悅有意古人之學無心流俗之同文恥雕龍

辯羞炙轂不顧巴人之和衆常憐郢曲之調高屢塵明
哲之知敢固顛蒙之守黽俛三春棲遲數年謹無朝夕
之渝肯有丹青之變月評借譽嘗居多士之先鄉版薦
名曾玷一經之首自意涇渭之易辨豈期鑿枘之相違
勉為方物之先幾作溝中之斷進觀前列且非刈楚之
精搜退處後塵徒起積薪之永嘆棄捐僅脫甄采有階
此蓋伏遇知府給事先生青瑣巨儒黃扉元老暫屈鈞
調之器來專屏翰之權志重提衡務先推轂曲直兼取

尋尺不遺致茲散木之材預此充庭之貢敢不淬乃鋒
刃整其羽翰發揚搏擊之心憑藉扶搖之便冀秦明之
再戰忍毛遂之備行渡河焚舟誓刷函關之恥捧盤歎
血決成楚國之盟庶鞭款段之資仰答薦論之賜過此
以往未知所裁

又

某竊以求賢用事明王尤重於得人發策決科君子宜
先於盡道取之苟且則鮮不失士得以僥倖則祇自貽

羞上當嚴論辨之程下必盡修明之術核之匪實能無
濫進之人應以有餘方免過情之誚國家百年累洽六
聖重熙文風暢於四方聲教覃於九有操衡石之權者
宜有至明之鑑摘華藻之文者肯懷苟得之心求之盡
公進必以禮珉玉雖渾駑驥自殊

上海門交代知縣呂通直啟

右某啟鄭錦當裁礪鉛鋒而請試魯塵方絕策駑步以
求前雖知仍舊以圖徽尚冀告新而為益交代知縣通

直道腴充寔吏術疎通稔效智於官聯浸飛華於表著
鳴絃結課已登優最之科馳駟揚庭行冠選綸之首陽
和在候福履惟休眷清晤以尚遙動忻虛而第切

謝湖南知縣啟

右某啟茲者叨寵宸綍備員漕臺已及蠲剛祇親簿領
馳短毫而未迨賁榮檢以先臨仰服撝勤俯增愧惕伏
惟知縣某官美德世濟長才自成製鄭錦以致工運庖
刀而多暇服禮過厚執謙有光增銘異數之先蕪幸餘

陰之庇

代回知縣長官啟

右某啟尺牘見貽華牋為副禮緣情而可貴辭溢美以
非宜未諧觀止之期已識勤斯之意欣懷彌至敷叙奚
殫

謝交割湖南帳勾職事啟

右某啟鶚表論薦驟竊所知綸言允俞遂膺成命脫徒
勞於屬郡當妙選於使臺忝越既多驚榮惟甚竊以不

求其備雖君子之與人慎簡乃僚亦前王之攸訓况漕
臺之雄府領全楚之舊邦下疊蠻徭上資調度轉輸維
富籍記宜詳取自疇人之中俾聞一路之事董司期會
參贊經營宜得琳琅之材庶裨金穀之政如某者術知
好古識愧隨時第聞詩禮之言惟蹈搢紳之訓淵明設
戶無慮常關元凱守經幾至成僻甘蜀人之寂寞恥季
子之揣摩曲學羞弘守儒嗤固東山遠引襟披安石之
風鑑水浩歌心醉季真之味鄉評則厚世道彌疎既淡

泊而不華遂寂寥而莫叩頃以偏親及養三釜可欣荐
塵秀異之名獲綴英雄之毅周旋十載俯仰萬端一顧
或逢三獻難遇大人奏賦氣徒負於凌雲太玄成書用
未逃於覆瓿涉洞庭之絕險適蒼梧之窮陬輕捐有限
之身深入無人之境庖刀合舞薄遊刃於越雞隋珠為
丸誤射利於黃雀美鬢奚施於斷髮咸池莫享於鷄鷓
涇渭同流不見濯纓之客薰蕕共器會逢逐臭之人念
筋力之坐勞惜歲華之徒費自顧數竒之跡分無濫吹

之私是何多士之名都獲備一臺之下屬顧茲幸會宜
有黃緣此蓋伏遇運使大卿先生德宇粹成道源深造
識臻物表義薄雲間脫流俗之常規蹈前修之高躅神
澄水鏡妍醜不遺用契權衡錙銖無爽千里之慘舒在
握一夫之情偽必知山甫平心物無吐茹仲舉有作志
在澄清見無娠之全人惡西子之不潔賞淳音於桐爨
認圓折於璇淵致資溝木之微竊此山苗之寵幽幽谷
邃鳴禽知向於遷喬漫漫夜長歌客欣逢於將旦某敢

不策駑駘駿礪鈍求銛守簞食之用心固酌水之素節
遼東犯敵期有立於當時泚水報功庶無辱於所舉過
此以往未知所裁

代謝河北運使王大夫啟

右某啟叨沐恩綸獲司漕計收采浸還於舊物吹噓實
賴於知音佩服居多瞻依第切運使大夫懿德敦大通
才敏明用無不宜致有成績天府贊治時高理劇之長
楚服詳刑下有不寃之譽起十年常平之墜緒首奏膚

公登三路廣運之外臺時成茂實行膺丹詔歸步紫垣
屬使指以方遙叩賓閣而未逮

代謝知郡大夫啟

右某啟叨擁使華逖分漕事撫湘中之劇郡遠江左之
名都投刺則遙向風甚邇睠融怡之資始想頒治以多
餘知郡大夫愷悌近民聰明周物推腹心而臨下勤夙
夜以在公條教惟明曲盡米鹽之務奸欺不作無煩鈎
距之機茂實丕成休聲彌遠居有依仁之庇坐縻從事

之勞裁尺素以未皇辱朵雲而先貺永懷謙挹罔既言
陳

謝改官啟

右某啟祇奉寵靈增深愧惕竊以由銓版之選陟中都
之官易事通功遂常靡於廩稍積久累日又馴致於班
聯榮路攸階公朝實重是故簡汰歲舉之數修明時攷
之科行欲察廉既詳嚴於保任事思核寔復數計於年
勞陳法惟精求人匪易必有連城之粹質兼茲剽兇之

長才有用斯成無瑕可視致事功於下列挹賞鑒於當
途眷惟多士之盛時茲亦貴遊之難事寒素何有覬覦
孔艱如某者涉世鮮謀抗塵寡術偶參差而在後遂濡
滯於徒勞未能忘捧檄之欣焉敢鄙抱關之賤芸芸獨
靜汶汶好修咸池之曲自高下里之歌方和賞音浸濶
投跡彌疎雜瓦釜之間時聞霹靂遊滄池之上亦見風
波居常憑軾以遐觀聊為解頤而一笑敢希席上已分
溝中何澗谷之乘時儷家庭而競秀永惟忝冒雅有夤

緣茲蓋伏遇某官先生器識恢疎宇量闊達體至公而
在服持平施以與人疎戚不遺浮沉兼載曲假吹噓之
力俾階進漸之津某敢不增礪素修益敦幼學不緇不
磷保堅白之有常彌劬彌高期始終之可錄庶有立於
盛德之世冀無辱于大君子之門過此以還未知所措
回致政林奉議啟

右某啟叨被恩綸獲貳郡事抗塵容而竊祿託仙里以
庇私末迨馳文首煩委記屈牋毫之異數借粉澤之妍

詞感琢銘心愧慚無地伏惟致政知郡奉議淵源學術
藻繪辭華久擅價於名場浸飛英於榮路雅敦止足之
好夙揚高尚之風多士明時不念朱金之貴名都故里
獨懷泉石之奇歆羨彌年參承有自欣忭之甚敷序奚
殫

許親啟四

右某啟以男下女天地之常經謂嫁曰歸古今之達禮
倘有以庇其妻子皆可以為之婚姻第十三女雖甫勝

筭未閑主饋薦沐行人之諭曲傳合好之勤伏承令姪
祕省天稟粹和人文秀發重違嘉好祇拜狀儀同居同
行適契墳簏之奏宜家宜室尚資琴瑟之和感悅惟深
敷宣奚既

右某啟二姓合好式嚴家道之成六禮備文大正人倫
之本薦沐行人之重申加儀物之勤第十四女雖已勝
筭未閑主饋伏承令姪祕省生資淑質世濟令猷既叨
伉儷之求用拜蘋蘩之貺其為欣幸曷既敷宣

右某啟特承媒妁俯惠緘題不間單平俾聯姻媾禮既勤至義在遵承欣幸居多敷宣奚既

右某啟某第二女雖親母訓未熟婦儀辱修合姓之文尚克宜家之美敬聞來命祇服眷私愧佩之深敷宣奚既

賀湖南交代耿帳勾啟

右某啟伏審拜命憲臺陞榮幕府兼北門之令宰字南楚之輸將伏惟慶慰交代帳勾宣德才猷敏洽吏道詳

明果膺薦達之書荐佐澄清之府瞻前何有愧糠粃之
遠揚顧後則奇想驛騶之高步增深欣頌罔既敷宣

賀盛祕教及第啟

右某啟伏審拜命楓宸升華桂籍伏惟慶慰新恩祕教
淵源問學藻黼詞章果收拾芥之奇不墜滿籛之計方
圖奏記先辱飛文感服增深敷宣奚既

代謝人賀子及第啟

右某啟星郵載路適當聞喜之辰桂籍騰芳竊有承家

之慶念箕裘之雖舊顧蘭玉以多慙豈圖入彀之英允
屬過庭之子年彌強仕曾未越於禮經名籍賢科尚弗
遺於世業方軫既盈之慮敢希溢美之談進服謙沖增
深感載

代賀湖北運使啟

右某啟伏審分華北闕抗節南荆總外計以建臺涓剛
辰而按部伏惟慶慰運使大夫風規峻整器宇恢闕聳
譽望以彌崇濟事功而克敏清衷所眷妙選攸歸攬轡

登車暫寄澄清之地代言視草佇陞宥密之聯某祇使
隣封希光餘照望賓閔而雖邇期慶謁以末緣欣頌惟
深言陳罔既

賀福建運使柳直閣啟

右某啟伏審顯奉恩綸榮膺寵數進直蘭臺之祕就增
計府之華朝論允偕輿情欣愜伏惟慶抃恭以計度運
使直閣器資瑚璉學詣淵源揆黼藻之詞華挺莫干之
鋒穎夙參英毅浸陟榮涂副當宁之旁求分外臺之重

寄爰膺斧繡言按甌閩足食足兵措八州於康阜示威
示德底千里於澄清既敦厚下之誠彌激拱辰之志夙
宵無怠本末具修罄土地之物宜嚴歲時之職貢春芽
龍鳳先百物以充庭秋實丹青徹九門而當御不費褒
斜之塵騎全勝陽羨之月團寧煩計出於心靈豈特錢
流於地上聲實既茂名數斯隆暫稽聊厚於遠民迅召
佇膺於三節北門南榻當指日以參華西掖東臺寧越
時而拜命某限拘官守阻造使閱欣頌徒深敷宣奚既

謝湖南程運使辟本司帳勾兼管勾文字啟

右某啟星檄載馳下飛文于大府雲章上達採微善於
屬城俾參考察之倫用越循常之選猥叨矚與第切感
銘伏以金穀重權朝廷大本民天所在兵力攸資煩非
簡而可從難非易而能任方盛際多才之日豈要津乏
士之時宜得非常之資以當不次之舉如某者智未周
物力匪兼人分符雖逭於曠瘵推庇誠由於寬假自慙
劉晏未贍地上之錢才愧桑羊素乏心中之計偶茲忝

冒粵有夤緣此蓋伏遇運使大卿先生聞望高華風神
邁遠清有集仙之貴重分全楚之權篤厚與人至誠體
國務重邦家之本不違尋尺之施凡有善之可收在所
知而必舉故雖疎遠亦預薦揚某敢不荷德知歸銘心
加勵誓幼學之無負壯晚節而益堅庶無悔尤用答顧
遇

謝湖南程運使回啟

右某啟伏以錦鯉一雙溢緘滕於魚腹金枝五朶泛墨

采於雲容析異數于使臺賁餘光於吏屬仰惟勤挹退
積驚榮切惟在昔大臣推庇羣寀依仁厚以自克顧微
賤而不遺言惟覆載之間物則飲食而已寧迂披霧俯
答望塵每尚典之往來染飛翰而酬酢矧惟疎賤素是
支離士譽無聞官成未效方庇德之云始驟踰分以妄
圖獻書自媒雖昔人之有在藏器而待顧君子以當然
退惟狂簡之謀宜在詆訶之列驟蒙嘉報莫喻所從茲
蓋運使大卿閣下玉質溫純陂量闊達執謙柄以毓德

被體服以華身言無至而不離文以進而為主故茲榮
問亦迨下官某敢不薰沐致嚴紬繹求旨攬凌雲之逸
氣玩入木之奇蹤紳悅謹書用作起居之戒囊箱是寶
永為子孫之傳

謝太府董大卿啟

右某啟伏以爵等尊卑上謹朝廷之制齒殊少長下伸
鄉黨之私並號達尊雅為通道禮有緣情而起義世因
習故以為常昔人嚴上第之榮遺俗有同年之好分兼

州里契若塤篥人匪尚賢義惟貴齒篤成事契施及子
孫歷世不刊達人尤重恭惟判寺大卿生資淑質夙揆
雄文爰在妙齡入華英毅振風神之競爽歷省寺之顯
嚴名實彌崇任遇滋重執謙撝之德厚尚風義之人難
某猥以拙疎叨居冗散當年雖忝於籍末今日方私於
庇餘敢以下官竊當異數夤緣賓次邂逅朝旌親屈上
司推先右席雖震驚而失色顧辭避而莫容人而無儀
益重庸夫之累卑以自牧第增長者之光踧踖奚安循

涯靡據謹奉啟詣門下陳謝

謝及第啟

元豐二年
時彥榜

右某啟三月二十四日皇帝御集英殿唱名蒙恩賜進士出身仍當日釋褐者太常奏籍既參秀異之倫司馬擇材復預辨論之列錫綸言而申飾紆艾綬以增榮荷寵惟驚承休知愧竊以登之天府周家特重于賓興辟以詔書漢室尤嚴于科舉尊大朝廷之體贊宣政教之條粵在右文之盛時茲實經邦之大本矧邁光華之日

挺生龍鳳之姿紹崇構于丕基跡遐蹤于治古剗革澆
漓之弊澄清淳厚之源沈戎柝于三邊暢儒風于九域
新辟靡之制中都高揖于鎬京廣泮水之規列郡奄同
于魯國振仲尼之木鐸闢高子之茅心日星乎六藝之
文金玉乎多士之質童子有造異人並生每丁大比之
期特降一封之詔首六鄉之內地迨四海之遐陬苟探
竹素之微言皆預賢能之清選大鈞廣播良器寔繁進
多離目之明名絕齊筭之濫應書而起粃粃均類菁莪

與計俱來藹藹無非翹楚矧春闈之較藝委大匠以掄
材考覈致精去留惟允鳩合萬人之傑來求一日之長
俯仰雲泥錙銖輕重一經顧盼價登十倍之高偶跌宕
釐失迨千里之遠及丹墀之登進降清問以諏咨察其
經濟之才責以該明之術顧惟哲士方稱賢科如某者
尋尺小材支離末學雖常游于藝苑尚未及于聖門斷
斷一書固慙於經筵區區千慮且異于智囊宜逃美錦
之譏聊慕舞雩之樂重念雙親將老明世鮮逢竊希三

釜之歡恥在一瓢之賤乃于鄉舉輒與計偕誰知尚類
于鉛刀僅施一割自愧未殊于夢翼不越九門比力振
于前功粗不忘于故步每惟見小而嘗怯敢期再鼓而
不衰偶逃飲墨之羞復遂拾青之志比沖天之翮雖已
愧于橫飛異抱玉之人幸無慙于屢獻此盖伏遇某官
詳明治本闡繹皇猷味雲漢之章務先作士詠臺萊之
什志重得人潛資暖律之吹密借長河之潤屬鶴書之
搜訪叨鸚表之薦論致茲十駕之儔玷此一枝之寵某

敢不益敦儒操恪守官箴慕從政於子張動遵五美效
接人于楊震居畏四知仰酬天造之恩次答已知之德
過此以往未知所裁

代汾州知州董左司謝監司啟

右某啟叨奉誤恩獲分符竹祇用剛日已見吏民依宇
蔭以有階祈緒言而可幸竊以民社之寄治忽所基自
昔攸嚴在今惟重方有為之盛且擴無外之鴻規宜得
循良克堪師帥如某者智未周物才不逮人猥被選掄

驟蒙驅策顧事為之未缺妬人言之多尤尚賴君相之
矜憐猶切麾符之榮寵獲居善地託庇使封恭惟某官
競爽才猷經綸術業望實雅高於士論忠純茂簡於淵
衷出建外臺坐輝畏日入參法從行駕追風尚資教篤
之私庶道稽違之負

代上廣西諸監司啟

右某啟叨沐恩輝就更使指偶以濶疎之器猥當欽恤
之司揣分非宜依仁有在某官稟凝粹遠質毓該明副

袞職之掄材列部封而抗節瞻星甚邇將諧聯事之歡
披露有期預釋晤言之想欣愉增至叙致奚殫

代謝都尉錢節度使啟

右某啟叨膺睿澤分領計臺顧虛薄之奚堪知恩榮之
有自伏惟都尉節使大尉分第世貴築館地親兼武子
之風流體獻之之標致德施惟普沾濡益羨於洪河言
出有章袞借增光於華袞密運吹噓之力曲成進躡之
私感服增深致宣奚既

代謝兗守程大卿啟

右某啟叨膺宸檢分假使軺得長者之故封見平時之
令緒知府大卿秉心敦懿莅事敏明入更九棘之繁出
使三湘之重轉輸有裕廉按不苛某早以道同猥蒙心
賞竊預光華之寵實緣題品之私

代賀刑部邢侍郎啟

右某啟伏審顯膺宸極榮貳秋官伏惟欣抃判部侍郎
德宇恢闔道源博洽夙從華望浸踐清涂禁掖代言炳

詞章於三代帥垣宣化善政事於四科果未久於雄藩
遂進聯於常伯暫資欽恤底五辟於惟明行恃變調同
四方於於變某屬分使指適遠賓筵惟欣頌以徒深在
言陳而奚既

代賀戶部孫侍郎啟

右某啟伏審顯膺宸極榮貳卿曹典民部之樞機總邦
財之會要伏惟欣抃判部侍郎才猷敏達器識闔深延
閣升華清流歸重戎庭秉律方面底寧果參常伯之聯

行正鼎司之任某屬將使指遠在南陬莫致賀於門闥
徒增欣於情素

又

判部侍郎器業恢闓風猷敏達游刃浸更於要劇飛英
益茂於班聯延閣崇名蹈英躔而高步戎韜重寄抗遠
畧以優為歷專方面之權克制兵家之勝

代賀戶部李侍郎啟

右某啟伏審顯膺溫詔榮貳司元伏惟欣抃判部侍郎

資周物之才蘊兼人之器歷要津而浸久底遠業以彌
光仗節建臺至有澄清之實總戎分閫居多鎮靜之猷
遂入副於卿曹佇升華於宰席某屬將漕事遠在湘源
阻修稱賀之儀徒重得賢之樂

又

右某啟伏審顯奉恩綸榮參常伯貳綱條於教典攝會
要於邦財伏惟慶慰判部侍郎器業恢闓風猷敏達游
刃浸更於要劇飛英益茂於班聯轉粟實邊觀使臺而

推重總戎開府分將幕以居先裕如足食之謀隱若折
衝之器眷圖茂寔進陟要津民部貳卿寧久稽於駿采
鼎司秉國行茂底於豐功某屬在遠方叨分使指莫修
儀於慶謁第積頌於高闕

欽定四庫全書

雲溪居士集卷二十六

宋 華鎮 撰

啟

四十六首

代賀中丞啟

右某啟伏審楓宸班命栢府陞華清衷允協於僉俞溫
誥特還於舊物聞聲增抃有感同情恭惟御史中丞術
業冠今器能高世出更藩屏入踐省臺心師聖哲之微
言動識朝廷之大體紀綱中外方資重厚之風調燮陰

陽行覩弼諧之效某遠從吏役久間台華隨賀燕以末
緣望朝烏而第切

代賀大名判府留守鄭資政啟

右某啟伏審暫解政機近思宮鑰涓剛辰而頌誥道協
氣以宜民恭惟慶慰判府留守左丞資政直諒深醇疏
通博洽薦更華要益茂吉猷進陪秉國之權居有庇民
之澤玉符異數式示重于保釐金鉉元功寧久稽于調
變某遠將使指久濶賓闕依德宇以有年望台華而繫

想

代賀發運修撰啟

右某伏審顯膺制旨丕總使權進兼仙殿之華增底計
臺之重伏惟慶慰制置發運修撰珪璋毓德柱石呈材
韜康濟之良圖底經綸之懿業輜軒攬轡參八使以觀
風華省分漕貳六卿而聯事式暫勞於國幹庶茂理於
邦財坐執六路之權行富九年之畜矣寧汙使節久當
金穀之煩側聽除書榮踐鈞衡之要某叨聯仙籍蚤跋

清塵獲盼昧以有初沐光儀而甚厚台華雖遠難修慶
謁之勤使部未違欣托沾濡之澤

代賀許左丞啟

右某啟伏審拜恩中禁進秩左綱總樞憲於天臺端本
源於聖化中外所仰欣抃攸同恭惟左丞閣下賢業浸
明德猷彌卽入參大政既底熙凝出奠介藩稔騰英茂
敦若濟時之器恢然經國之才會圖舊之昌期協又新
之盛德果膺宸極復預政機注想法宮方視疇庸之漸

陞華上宰佇觀當軸之勲

又

右某啟伏審顯膺溫檢茂陟華資陪三事之訏謨總一
臺之網轄伏惟左承閣下經綸遠業表著宗工體儒術
以無違赴事功而克敏早陪國論挺直諒之風規歷踐
師垣暢中和之條教益華茂實彌簡淵衷乃眷舊人陟
是具瞻之地行登上宰式資於變之勲某叨寄使華遊
居湘楚阻修儀於賓館徒積頌於恩綸

代賀蔡右丞啟

右某啟伏審顯奉制書進登右轄總綱維之要地肅機
政之大源中外所同驩呼惟甚恭惟右丞閣下英資敦
敏茂業恢疏夙參侍從之榮稔著蕃宣之效當大明之
繼照冠舊德以先求暫階西掖之清華旋進北扉之宥
密中臺掌憲未殫經濟之猷上宰持衡方底變調之績

又

右某啟伏審顯膺明命峻陟崇資參政府之謀謨總中

臺之網轄伏惟驩慶右丞閣下粹凝德宇俊徹神機造
姬孔之醇深挾淵雲之典麗絲綸潤色早參侍從之華
符節承流久次蕃宣之重屬聖神之圖舊率訓典以維
新首歸步於掖垣浸陞榮於內相參斷國論方圖經世
之猷變理元功式底格天之績某續分使指式遠鈞闕
莫陪賀客之聯徒跂翹材之館

代賀祭酒啟

右某啟伏審顯奉綸言入典胄子發道術之素蘊美教

化之大源有職所聞與時共慶祭酒閣下粹鍾淑質允
蹈大方所養甚高其成則茂宣冠師儒之選克專膠序
之權適在盛時果膺榮命賀德基重暫資學行之師謝
傅才高自有公輔之望某夙蒙獎誘猥荷品題漂泊南
陬羈縻祿仕去門牆而正遠親杖屨以何階賀燕阻陪
傾葵第切

代上中書蔣舍人啟

右某啟伏審光膺制詔榮典絲綸僉議惟諧輿情均慶

恭惟中書舍人閣下英資異稟茂識少成學窮游夏之
淵文挾淵雲之麗峩冠英毅人傾杜牧之才發策賢科
世服平津之對羽翼已成而誰關金玉其相而莫遺陞
榮峻陟于烏臺結課浸更于鳳歷益華遠業頻據要津
六路轉輸集豐餘于指顧三隅統制收晏靜于笑談克
懋事功稔聞天聽果膺神檢歸步掖垣法從清華暫屈
湧泉之思廟堂密邇佇觀和鼎之勲某夙庇雲陰早塵
鶚表隨牒浪遊于南北登門浸濶于陽秋大厦則遙雖

莫陪于賀燕皎日可見切自效于傾葵

代謝廣西提刑曹司勳啟

右某啟澤沛禁嚴職分漕計總重湖之劇郡跂逸駕之清塵爲德孔多圖工匪易提刑司勳器識惟茂德義甚高早更要津敷歷撫任天官列職稔聞練達之猷閩嶺分臺綽有阜成之效果即三湘之使節驟陞五管之廉車當尋經畫之成庶習步趨之舊

代賀福建轉運判官秦朝奉啟

右某啟伏審顯奉恩綸就更使節體中邦之調度總外計之轉輸伏惟歡忭運判朝奉器識閱深規爲敏達早列光華之選茂司金穀之權江右分臺既底澄清之績閩中攬轡益華豐羨之成某屬在楚封叨分使事莫展趨承之禮第傾欣頌之懷

代謝廣西轉運判官啟

右某啟計臺叨寵楚服分華涓吉日以有初辱慶言而未貺循惟則愧拜捧斯榮伏惟運判某官藻色冠今謀

猷經世宸衷簡在使寄推先南海辭行已識寧親之志
桂林馳傳更敷許國之風挺忠孝以兼明藹聲華而益
茂某早傾高義晚託隣封爍爍餘光雖有依於東壁翩
翩振鷺當無間於西雝跂觀褒選之書召即深嚴之地

代賀湖南轉運判官張朝散啟

右某啟伏審揚軫出使擁節臨封即遂瞻顏增與聯事
運判朝散才華卓茂識用疏通攬轡神州早馳俊采分
符劇郡益奉膚功暫迂湘楚之轉輸行踐掖垣之清切

晤言尚闊珍養是祈

代賀湖南轉運判官張朝請啟

右某啟伏審榮被恩綸就持漕節涓辰初上接壤同休
伏惟運判官朝請躬宏博之材蘊剛明之德天圻日域
早皇原隰之華江徼淮壩尚播袴襦之詠公言久鬱士
望攸歸果從八俊之求來奉三相之計知能汎應已聞
樞得其環中貨必阜通將見錢流於地上某常瞻大旆
復預隣封自惟孤根雖賴河流之潤但虞淺水難留海

運之程行見召書別膺要用

代謝兩府啟

右某啟寵應二星部分八郡擁光華之節傳握飛輓之
樞機攬轡登車曾是十年之舊觀風入境適當三楚之
遙撫已自憐循涯知幸國家百年累洽七聖紹隆道德
一而風俗同禮樂興而刑罰中郁郁乎周家之文采濟
濟然堯日之人才方全盛之昌期圖非常之治具伎寧
容於濫吹人必趣於襲情又況總一路之紀綱參八俊

之風采幹旋金穀而國用豐羨識別功罪而天下澄清
宜資經世之才克振外臺之任某早緣識擢叨備使令
當熙寧之盛時將神州之使事夙夜惟謹涓埃粗聞知
戮力於公家耻謀身於私室仇人伺隙吏議索瘢散地
何傷未歎馬談之留滯公道不替終符安國之再燃旋
膺綸綍之私榮假麾符之任念齒髮已向於晚景顧筋
力不逮於當年方求便於寬閑庶圖安於簡易淮壖衝
要尚虞刻水之難湖外浩穰驟委分臺之重茲蓋某官

閣下克調鈞鼎平運機衡務求舊以取人助惟新於置
器不問數奇之跡圖官已試之誠某敢不尋繹前聞經
營來效阜財利用忘負米之勤勞扶弱摧姦想埋輪之
風槩

代謝兩府啟

右某啟恭被制書肅將使指襲繡衣之舊物撫全楚之
守封輓粟飛芻管盈虛於一路揚清激濁豫臧否於八
州去國雖遙受寄則重切念某早緣儒術浸歷官聯傳

經無博洽之聞從事愧彰明之效適光華之盛旦踐中外之要津闕嶺分臺曾是澄清之地天官列職夙當勲績之司偶血氣之失平巧魔符而求便地分號畧封邇都圻體釋沈疴方免維揚之卧治驛騰溫詔遽叨宣室之召還未緇九陌之塵旋付三湘之節懇詞雖至成命必行去不乏人寧異雙鳧之未少用之以禮直同一鶚之莫如蓋某官閣下秉直道以經綸體至公而翼亮密運埏鎔之力曲爲蟠散之先任賢使能適是有爲之際

循名責實願逃無補之譏庶協先猷未虛鴻造

代汾州知州董左司謝兩府啟

右某啟入副左轄旋致人言出守西河尚私郡寄荷德之厚揣衷惟慙切念某迂闊散材空疎後學涉世途而雖久稽事實以無聞早緣品題謬塵驅策踐省寺之要劇擁節傳之光華不閱歲時驟私任遇惟聖朝之多士眷宰屬之近僚乃沐甄陶特加援引陳力就列雖自竭於駑駘言時計功曾茂聞於毫髮上負高明之賞旁招

忝冒之譏分甘棄捐望絕收采敢圖化筆猶畀州符此
蓋伏遇某官鈞衡乃心海嶽其德體至公而平施廓大
厦以兼容俾叨牧養之權更付優安之地某敢不祇勤
郡政宣布詔條上承乃聖之休下究斯民之瘼庶逃瘼
曠用答矜憐

代上發運待制啟

右某啟伏審清衷密眷延閣華資煥綸檢以惟新即使
臺而還舊伏惟慶慰制置發運待制英猷嶽峙俊采霜

飛齊魯觀風早擅澄清之美江淮總計薦騰豐羨之休
進參法從之榮職是元鈞之漸某屬分使事迹在湘南
莫修慶謁之儀徒極欣瞻之意

又

右某啟伏審茂簡清衷載揚明命即計臺之要地還延
閣之華資伏惟欣抃制置發運待制幹理長才經綸遠
業昔在齊魯克茂事功今總江淮復饒邦賦果延登於
法從行入秉於政機某承乏部封希光德宇跂賓闕而

雖遠望使節以惟欣

又

右某啟淮壖假守德宇承陰借華衮之褒揚勞仁心之
教載雖遐將於漕計曾未越於使封有闕清塵尚沾餘
潤制置發運待制長才周物茂業冠時敏名實以彌華
聳班聯而益重暫總轉輸之要尚迂調變之資將使事
之云初跂賓闕而方遠

又

右某啟濫被恩光遠分漕事雖有江湖之阻尚居封域之中切邇使華共圖邦計制置發運待制淵謀遠遠駿采疏通早登襍繡之榮途茂集劉錢之優最會逢明盛總攝轉輸行無千里之逢坐有九年之畜前席之召翹足以須顧有繫於官居愧莫登於賓次

代回彭承議啟

右某啟叨被恩章獲司漕計方臨部事首辱慶言綢繆累紙之勤申複多儀之貺感銘第切敷叙奚周

代賀西府正旦啟

右某啟伏以月正孟陬卦成交泰履祥瑞於四序洽慶
禮於三朝某官師表百僚膏潤萬國一德上同於辰宁
九功時序於寰區歲律維新發大春而敷育神休滋茂
協令序以來綏某叨寄使華屬遙鈞屏徒積望塵之想
莫修獻歲之儀祈頌增深言陳奚既

代回廣西屬官啟

右某啟叨膺恩旨擢總憲臺顧進秩以雖優懼登車而

未久猥辱撫謙之意遠貽溢美之詞感篆增深敷宣罔
既

代回秀才獻書啟

右某啟伏承曲回組轡特貺華牋文高片玉之珍意重
兼金之贈增深感服罔既敷宣

回梅子肅奉議啟

右某啟伏以洋洋雙鯉泝北浪以將騰郁郁朶雲駕南
風而先至累幅綢繆之意盈前粉澤之詞捧味再周欣

愧兼集恭以知郡奉議南金賈質東桂仙科道有本而
莫窮術無施而不可月評載美冠閭里之勝流歲比書
功積中外之優最暫寄雙旌之重佇觀三節之趨某叨
貳郡獲居仙里未遑修記首辱飛文沐異數之過勤撫
微躬而增愧

代回郴州知郡李朝散啟

右某啟伏審丕奉宸綸榮懷邸紱爰因穀日已撫治封
伏惟懼忭知郡朝散吏道惟精官成稔著分一麾而作

守提千里以臨民未瞻片玉之姿首獲朶雲之彩欣銘
兼至叙致奚殫

代回全州知郡王左藏啟

右某啟職在薦賢義圖報國遠辱緘滕之貶曲貽華藻
之詞緬服撫勤增深悚戢知郡左藏早從戎律通識事
機尚蹈分閫之奇暫寄剖符之重諒遵令序允集多祥
誦咏徒深敷宣奚既

代回衡州推官啟

右某啟遠勤專介特枉長箋攬麗藻之流芳識謙光之
至意增深感戢罔既敷宣

代回湖南檢法推官啟

右某啟遠勞專使曲致榮題稔聞聲實之華亟列封章
之薦庶有光於公道敢圖謝於私門愧戢增深叙宣罔
既

代賀吏部林尚書啟

右某啟伏審顯膺帝制榮正天官冠六典以經邦統百

寮而掌治伏惟欣抃吏部尚書聲猷夙茂望實彌隆久
參侍從之華歷著藩宣之效入陪西掖既潤色於王言
進陟中臺復增光於邦治行擁絲綸之詔茂登鼎鼐之
聯某屬使江湘冗將芻粟莫趨陪於賀客徒結想於臺
闕

代謝發運侍郎啟

右某啟叨奉綸言出將使指雖在三湘之裔地未踰六
路之提封聯事有光依仁可賴制置發運侍郎聲華朝

右器洽世資貳卿列以分曹冠文章而騰實茂膺眷注
丕總輸將坐登邦計之豐餘行預國鈞之調變分封有
地懷刺無階跂行府以甚遐念搖旌而第切

代謝和州知府王侍郎啟

右某啟叨蒙恩旨榮假使權顧單淺之何堪實吹噓之
有自欣愉彌至感篆惟深知府侍郎覺在民先望居朝
右乃敷歷高華之選發揮庸敏之猷總計漕臺分三路
之劇部飛英省闈貳六卿之近聯雅推鼎鉉之資寧久

江城之守某方遙台屏阻造鈴齋欣桑梓之有依跋冰
玉而係想

代賀內翰啟

右某啟伏審拜命治朝陞華內相承制詔之密旨預軍
國之深謀盛世所崇清涂莫二允當公論慶洽輿情恭
惟內翰道傳孔孟之醇文擅淵雲之麗早登法從歷踐
雄藩毓聲聞以彌休疇事功而益茂卓有高華之器必
居清切之聯使寄久居士論未厭屬聖人之有作收舊

德以圖勲首還西掖之資旋進北門之選銀臺秘直方
資顧問之竒玉鉉具瞻快覩變調之用某量依桑梓竊
覘旌麾侍台座以嘗親聽金聲而時預比將使事言遠
門牆想厦燕以難追效海鰲而增抃

代賀蔡內翰啟

右某啟伏審拜命治朝陞榮內相兼綸闈之要職總金
匱之信書伏惟驩慶內翰閣下挾競爽之資濟該明之
術詞華備於制作論議達乎古今天府浩穰剗裁多暇

邊隅控制指顧有方會逢圖舊之辰浸被惟新之命分
曹民部總計邦財既登豐羨之勲益茂倚毗之眷玉堂
視草式資宥密之謀金鉉調元行著變和之績某屬將
使指遠在湘源莫修慶蠲之儀徒積傾瞻之意

又

右某啟伏審拜命治朝陞榮內相伏惟欣抃內翰閣下
淳深毓德敏濟凝資夙蹈英躔雄飛要路天府之聲華
藉甚師垣之望實藹然民部列曹克奏羨餘之績金鑿

進貢益親宥密之機佇載備於絲綸茂入當於鈞軸某
屬將使指迹在湘濱欣頌增深瞻依第切

代謝顧內翰啟

右某啟近者述職皇州薦登賓席分麾楚裔旋去門牆
跋龍阪以彌遙傾葵心而第切恭惟內翰閣下秀分巖
壑美毓東南陂量汪洋星華皓皓蔡義經術允惟天子
之師陸贄辭章居然內相之任行司鈞軸方在埏鎔驟
披郇國之朶雲如對魯山之眉宇仰惟卑牧退切驚榮

感篆增深序宣奚既

代賀邵州知郡陳朝請啟

右某啟伏審顯膺宸檢榮剖郡符式涓剛吉之辰肇布
中和之政伏惟慶慰知郡朝請性成懿德世濟令猷浸
更表著之崇夙藹蕃宣之譽拘文有限未舒披霧之勤
望履非遙切喜依雲之便欣瞻第切敷叙奚殫

又代賀邵州知郡張朝請啟

伏惟慶慰知郡朝請業茂宗儒名光世德浸陞華於朝

著稔騰實於麾符何幸屬城親承善政顧慶言而未致
辱華翰以先臨感篆增深言陳奚既

原注上半同
陳朝請啟

又代賀衢州知郡黃朝請啟

右某啟伏審光被綸言榮分麾守察風謠而問俗敷條
教以宜民伏惟欣抃知郡朝請識濟強明政光愷悌浸
陞華於表著稔馳譽於藩維千里牧民側聽中和之頌
三月報政政觀褒表之書某屬遠崇闕阻修賀禮欣瞻
第切叙致奚殫

又代上宰相乞移淮浙一郡啟

右某啟伏念去國歲久造門迹稀懿德雖勤瞻顏未逮
恭惟僕射相公儒林博碩先朝老成茂協庭僉進陪國
論秉至公而待物展素蘊以濟時海角天涯既悉歸於
化筆鶴長鳧短當不棄於元功一將使指兩易歲華瓜
期已逾匏繫未解松楸不掃羔雁失時無補公家虛墮
私計比敷短奏上千清朝旬淮浙近郊或宣廬便郡倘
蒙矜恤曲賜陶成荷德之洪舉族知愧

代邵郡謝知郡藍皇城啟

右某啟祇服訓詞進膺睿渥總五管之遐服陟三章之外臺顧已分以有踰懼僉言而未與知皇城成人惟美執德思謙過形粉澤之辭首致緘滕之貺銘言第切叙意奚殫

代賀侍從冬至節啟

恭惟某官瑞應明昌彙征清切煥高文而華國經遠業以宜民氣有幹旋萬物當從於天統道該消長大人斯

介於神休某叨使遐陬屬遙台屏莫致捧觴之禮徒傾
望履之誠祈祝增深名言罔既

代賀湖南提刑冬至啟

右某啟伏以圭影迎長葭灰肇律亞歲儀而展禮對天
運以承休提刑某官視遠因明好生協德履陽來之令
序宜神介之繁禧屬此拘文阻前爲壽傾依第切頌祝
惟虔

代賀東府冬至節啟

右某啟伏以愛景迎長新陽來復探三微而肇律觀五
物以書雲恭惟某官玉鉉調元槐庭論道協贊惟幾之
務弼成於變之勲賢業無前聳民瞻而有賴天元資配
對時序以承休某叨使湘源屬遙鈞屏徒跂翹材之館
莫陳亞歲之儀欣頌惟虔名言罔既

劄子 三首

乞東封劄子

某輒有管見上瀆鈞聽某竊惟皇天上帝以盛德妙道

付畀聖君賢相非徒以善一人之身將託以成天下之民也惟庶民不能以自治故作之君以治之惟一人不能以自爲故作之相以輔之受天錫之勇智得斯民之先覺君臣相遇或以大功定寓內或以至德善天下者皆定職於天底功於世功成治定禮當告成故治世盛時莫不登封泰山登封泰山所以告也其君則皇帝堯舜禹湯文武其相則風后力牧臯夔伊周海內之事自李唐遭安史之變成尾大之釁陵遲頽靡二百有餘載

生靈塗炭神祇厭亂天乃篤生藝祖太宗真宗三聖相
繼以神武平僭竊以仁義寵生齒付畀之功既成海內
之治既定故真宗皇帝櫛風沐雨東幸岱宗欽脩大典
不敢怠忽所以昭事上帝也帝王之道自成周失文武
之緒困強霸之說澆漓失墜千有餘載人不見德法度
散亡天乃篤生神考哲宗暨今上皇帝聰明睿智繼繼
承承熙寧中神考以神堯之道文武之法責成於先正
文公文公以孔孟之學周召之業革曠世之弊相熙豐

之政大功未既橫議有作紛更沮壞天下切齒紹聖脩
復未及者多崇寧之初爰立賢輔同心一德協謀大政
經營講論內外並作脩綱修紀小大不遺六年于茲功
德明茂人安物阜時和歲豐政舉刑消禮制樂作羌戎
欵附人神綏和珍符嘉瑞近自圻輔遠及邊陲日月進
獻者無有虛歲竊以爲聖人之能事既備帝王之功業
著矣講修東封告成于天宜在今日伏惟鈞慈特賜留
神申明朝廷振舉大典天下幸甚

乞頌降州軍大樂劄子

某聞孟子曰仁言不如仁聲之入人深也三代盛時雅頌之樂皆自都圻達於邦國故詩序曰用之鄉人焉用之邦國焉是以道德純一而風俗大同國無異政而家無殊俗近者伏見朝廷下大樂局製造三都四輔大樂將以播越仁聲通流善教鼓舞都圻躋之粹和此大惠也某竊以謂今之三都四輔即古之鄉遂矣今之州郡即古之邦國矣誠以國家之盛大樂既作頌之州軍俾

歲時以祀享學社講修鄉射使四海之內皆得稔聞仁聲服熟善教孝恭益明而人倫彌厚無有內外遠近之異斯民曷勝幸甚伏惟鈞慈特賜採擇

湖南轉運司申明茶事劄子

代運判
曹輔作

某嘗謂天下之事有存之無補于公家而有害于細民去之無損于公家而有德于細民者理之所當必去者也某幸賴朝廷職擢備位部使者部有弊事不敢不言而使朝省聞焉湖南一二歲以來年穀登稔盜賊衰息

蠻獠安邊境不驚上賴朝廷威德鎮撫賢相變調之
賜甚厚百姓幸甚幸甚惟歲科本色大方茶一十五萬
斤民猶受其弊輒條具利害上浼鈞聽潭民有茶園者
十無二三每歲納茶則凡在稅籍例皆納無茶園者迫
于期會既以高價買茶受納之所茶商舟子諸色公人
復多方邀阻乞覓錢物不與則毀壞退換與之則資陪
無藝每茶一斤嘗費數百錢民力不便深苦其弊唯傳
塌攬納之家與茶場公人市廛游手之民以此爲便元

祐初朝省以京庫茶數有餘權住科納三四年只令送納價錢每斤三百七十二文省人戶欣然咸以爲便遂有茶場角子安慶往京師計構舊日市易司買茶勾當人戶陳介令弟陳愈詐爲潭州人戶投狀乞納本色省部不知遂下潭州依舊科納元祐八年湘陰縣人戶陳講探知上件情節經州陳論潭州備錄申本司前任轉運判官張琬遂具劄子乞依舊折納價錢尋奉聖旨聽從人戶情願推行以來一二年間人盡納錢無有一戶

情願納本色茶貨者以此觀之民間便于納錢不便于
納茶灼然可見矣昨來本司遂申乞今後京庫遇缺茶
貨即令預降數目下本司于採造時月置場收買去年
四月間雖准省部令科納一十五萬斤如過採造時月
即限至今年秋季納畢緣至去年十二月間却准省部
指揮稱京庫茶已有一年及一次大禮支給準備所有
紹聖二年茶貨權住科納令本司封樁起發折茶價錢
并糜費錢本司遂便不科納至四月間雖却准省部指

揮令科本色茶貨本司爲已過採造時月遂再具京庫
有備及本路續起去茶數因依申省至六月間省部專
委轉運副使柯述催督科納是時民間所有茶貨散賣
已盡人戶送納價錢亦已過大半矣雖欲科納茶貨已
無徒爲搔擾已申省部乞限來春科納今來省部奏勘
本司官吏故違勅旨不肯科納稅茶緣有上項情節理
合申請非敢故違勅旨庶蒙聽納則有利細民耳茶場
公人官司非不鈐束小人趨利不顧憲禁僥倖苟免肆

爲欺弊剝刻細民置場和買非無勾當諸般公人緣買
納兩端事體不類投官中賣者不售則持而之他與私
爲市矣何所繫累復有求于公人小人知其然自亦不
敢故爲阻節一行科納則理勢相遼科之有數納之有
限缺數違限追呼督責費用百出雖有良貨或遭黜退
則門戶之事未得了足納茶人戶豈容無求于茶場公
人小人知可以乘事勢而邀厚利則肆爲姦巧無復顧
忌此本司所以欲人戶納錢而官自買茶也茶數不缺


與科納無異折價有數與納茶不同此前所謂無損于公家而有德于細民者也伏惟經國之餘少留神慮儻蒙采錄畫爲定論則一方之民豈特身受其賜世世子孫蒙被德澤幸甚幸甚

小貼子

附

況潭州方茶每一大斤權以省秤得九斤之重歲科一十五萬斤則爲茶一百三十五萬斤矣水磨茶所歲得增賣一百三十五斤爲利不貲伏乞照會本路今歲起

發過上供見錢六十六萬七千五百餘貫米七十餘萬
石銀錫絕布茶蠟雜物共二十一萬九千三百六十斤
兩條匹任職所在敢不自勵更乞鈞嚴少賜寬假庶效
尺寸圖報萬一幸甚幸甚



欽定四庫全書

集部

雲溪居士集卷

二十七至
三十

詳校官庶吉士臣吳烜

侍讀臣孫球覆勘

謄錄監生臣龍舜耕

欽定四庫全書

雲溪居士集卷二十七

宋 華鎮 撰

表

九首

賀興隆節表

臣某言伏以律徧四時，奠華八葉，實誕彌之穀，旦屬不
赫之昌期。虔禱無疆，敷同有截。臣某誠懼誠忤，頓首頓
首，恭惟皇帝陛下聖心天縱，俊德日躋。繼述先猷，緝熙
成業。邁文聲而通駿道，武烈以增華舟。車所通聲教，咸

暨屬臨誕節罄率土以同歡環仰清光指南山而獻祝
臣遠違北闕久使西湘望日表以天遥跂驚庭而地遠
第虔頌禱永固明昌

又

臣某言伏以玉燭導和當四氣告成之月電樞呈瑞逢
一人慶誕之辰文軌所同歡欣交至臣某誠懽誠抃頓
首頓首恭惟皇帝陛下纘休聖緒邁駿皇圖配雨露以
涵濡體乾坤而覆燾東漸西被既堯道之無偏魚躍鳶

飛得周仁之有作豐功不宰懿鑠難名每逢誕聖之期
咸慶後天之禱臣屬將使指適遠班聯漢殿稱觴莫預
在庭之列華封祝壽徒傾僚日之誠

又

臣某言伏以嶰管宣和導二陽之卦氣階虞紀候敷八
葉之祥符光標出震之期允屬乘乾之旦車書所至玉
帛交馳臣某誠懽誠抃頓首頓首恭惟皇帝陛下篤實
輝光聰明睿智體一德以嘉靖總萬邦而協和天施地

生運神功於無外雷聲淵默藏妙用於難名爰臨星電
之辰均效封人之祝臣屬將使指逝在湘西莫陪北闕
之朝但切南山之禱

又

臣某言伏以夜明合朔序徧四時冬日周天經纏八度
本社鳴之穀旦協繞電之靈休嘉節垂芳幅員同慶臣
某誠懽誠抃頓首頓首恭惟皇帝陛下纘戎丕緒繼述
先猷稽古道以增華圖舊人而熙載有政有事惠康小

民不識不知靈承上帝混夷夏以懷保達神人而協和
四海驩心盡傾馳於茲日千齡景算咸頌祝於昌期臣
屬奉恩輝叨分漕事撫三湘而地遠仰雙闕以天遥漢
殿稱觴莫綴鸞鴻之列堯封獻祝第傾葵藿之誠

代湖南監司賀正表

臣某言伏以璿璣端始玉律回春行夏正以示人協漢
儀而獻歲臣某誠懽誠抃頓首頓首恭惟皇帝陛下克
明俊德率由舊章能持盈而守成善繼志而述事惟馨

可享幽有格於鬼神常善不遺明克成於人物肇因月
正丕御治朝享萬國之歡心備三元之慶禮琛珍在列
知聲教之無方圖籍盈庭見幅員之既庶臣叨分使節
限守官聯莫陪鵷列之趨徒効嵩呼之祝臣無任

又

臣某言伏以歲月更端乾坤交泰備漢儀而講禮罄禹
跡以來王臣某誠驩誠抃頓首頓首恭惟皇帝陛下正
位居中體元建極邁文聲而繼志揚武烈而增華神化

難名盡帝王之能事天臨無外得夷夏之歡心不御治
朝肇修元會萬邦玉帛光昭侯伯之勤四海圖書奄有
山河之大臣叨分使指屬遠朝班莫趨魏闕以稱觴徒
效堯封而祝壽臣無任

代汾州知州董左司謝到任表

臣某言臣解官省闈分土西河榮兼師帥之嚴重有兵
民之寄蒙恩踰望揣分增慙臣某誠惶誠恐頓首頓首
竊念臣跡本孤生人惟卑品偶緣末學獲齒清流徒更

積久之歲時曾無可書之名實黃緣論薦叅預詳延密
奉威顏愧乏高明之論親承溫詔猥叨訓獎之私遂以
卑平驟階識擢掌分部司府二卿雖任使之屢更卒涓
埃之無補將命北狄僅逃虧辱之尤承乏都司未著彌
綸之效罔字士論果致人言忝冒既多投遠是分敢謂
斗筭之器尚塵符竹之權茲蓋伏遇皇帝陛下日月照
臨乾坤容覆灼見隱幽之遠不遺纖介之微念此空疎
嘗加策勵付之郡寄俾懋官成臣敢不勤撫吏民祇宣

詔令究心戮力外式典彛顧後瞻前內滋明知俯免曠
瘵之責仰酬生育之恩

代湖南諸監司奏乞故知兗州程博文致仕恩
澤表

臣某等言臣等伏見故朝請郎新差知兗州程博文志
力精敏篤於公家知無不為至有成績在熙寧間先帝
脩明法度王安石薦其才首當條例司選任裁處牛羊
司利害經畫綱紀草絕冗費先帝知其可用後因開封

府闕推官遂擢任之由是歷兵部郎中太府司農少卿
權大理卿周旋省寺二十餘年頗著勞效昨因使事北
廷在路遇疾比及湖南服勤二年失於治養近蒙恩差
知兗州行次江寧府遂以不救道路之間不及以時致
仕雖嘗於江寧府附奏陳乞一日之後即至捐館有礙
奏薦恩澤欲望朝廷察其平昔宣力最多以其生前嘗
曾陳請雖已身亡特賜指揮許令奏薦臣等知其本末
今茲奉使在其前所治部故敢冒昧奏聞臣無任

漳州謝賜政和三年紀元歷日表

臣鎮言伏以書成歷正知天道之有常賜及海隅見帝猷
之無外拜恩既渥撫已知榮臣鎮誠惶誠恐頓首頓首
恭惟皇帝陛下日月並明乾坤合德履三元而端始協
五紀以明時視民無內外之殊與物盡阜成之利臣叨
逢聖日權奉郡條夙夜頌宣敢失彛倫之叙雨暘時若
庶來蕃廡之休仰奉宸慈俯熙遠俗臣無任

策問 六首

問歷代巡狩制度因草策

問巡狩者前世之大經百王之通法也書傳所載其詳可考故舜有天下五載一巡狩歲徧于四岳夏商因之其典不廢雖周監二代郁乎有文六年五服一朝而申之以諭言語聽聲音同數器脩法則足以協和天下至於十有二載王亦時巡考制度于四岳漢魏而下中智之君粗安之世猶或射蛟江流耀武朔漠存問耆艾賙賜疾苦作盛典於當年追高風於治古而況聖德日躋

王業祇固禮制樂作兵銷刑措之世乎則斯禮也在所
當講國家因五聖之不緒紹百年之治跡法度脩舉庶
績熙凝四陲無犬吠之警中原藹休和之氣斯可以振
清蹕於岱宗覲羣后於太華協時月於南岳同律度於
朔方東脩白雲之故封西申汾陰之典祀揚藝祖之大
烈覲神宗之景光方駕商周並驅虞夏垂訓後昆永永
無極豈不偉哉然舜用五載雖數而不費周十有二年
雖踈而不缺其出有時其適有方其所以告神祇之禮

觀羣后之儀同乃制作一乃度數覽觀風俗之變而考察治忽之故慶以旌善削以黜幽有政有事載在方冊諸君考古之制度今之宜孰在所因孰在所革幸詳言之有司將以獻焉

問漢宣孝元王伯之道優劣異效

問昔湯居亳地方不過七十里德茂於內淑聞四馳天下望之若雲霓之在旱歲遂及其身享有大寶傳五六百載其遺統餘緒微而不絕武丁因之朝諸侯有天下

猶運之掌周文王之治岐也亦百里之國端本正始載於閨門德教道化遠漸江漢雖大勲未集而三分天下有其二武王紹興克承丕烈後世厲王失道天下板蕩幽王荒廢褒姒滅之然而德澤之美風俗善人心者猶未卒斬故風雅之變尚知止乎禮義民之允懷未能弭忘子孫相承復五百餘年然後已何其懋哉五伯桓公以元侯之重據十二之地挾王室以令諸侯周旋數十年而功名止乎九合劫辱於曹沫見欺於陶塗智力之

強盛年有所不伸寧足以傳無窮而庇嗣續乎王伯之道優劣異效甚矣漢宣帝持雜伯之說鄙成周之政元帝言之憤然不以為是其為論駁矣考之前史宣帝之起實繼昭帝強明俊發漢道復興為政之效優於文景孝元承中宗之後尊儒重道有意乎商周之為卒之優柔縱弛綱紀弗振漢之衰微乃自此始王伯之效何其悖於昔耶諸君試詳言之庶有以質前世之事

問列爵經界五刑

問帝王之道盡於堯舜天下之法備於成周是故仲尼
祖述二帝而憲章文武恭惟朝廷深明先聖之微旨體
堯舜之達道修文武之良法以幸天下繇熙豐以來至
於茲三十餘年顯謨承烈有繼述而無遺美是故分曹
設官六卿之典也保甲隸武卒伍之政也農田水利溝
洫之制也歲考月試庠序之教也居養以厚無告漏澤
以及淵泉皆岐鎬之所行王政之先務罔不畢舉難徧
以一二數茲可謂千載一時大有為之世矣武成曰列

爵惟五分土惟三孟子曰仁政必自經界始經界既正分田制祿可坐而定也呂刑曰墨罰之屬千劓罰之屬千劓罰之屬五百宮罰之屬三百大辟之罰其屬二百五刑之屬三千此三者四代所共由三王之不改王者之政莫大於此今廟堂之上將議之不輕為之有序神明之用藏於妙微不驟以示於人歟抑古今異宜通變不一師其心不膠其跡矜其治不矜其同一代之制等其名實自足以比隆前王貽訓後世歟此承學之士所

知也諸君詳言之毋隱

問井田肉刑封建

問昔者三王相承而起質文迭用或損或益不相沿襲
至於建侯世守井地肉刑雖封域異制助徹殊號刑罰
輕重與世升降而三者大法未嘗易也聖人之法有盛
有衰必至之理豈夏商之季百度皆弊而此獨未壞哉
必其法盡善而百世不可改也揚子雲曰井田之田田
也肉刑之刑刑也夫魯人什二而孔子有盍徹之談秦

人罷侯而漢世有孤立之戒孝文用鞭笞代刀鋸而當時議者已謂名為輕刑而實重之由是以觀先王之法此殆不可變已何新室為王田而天下怨叛東漢議肉刑而孔融異詞貞觀復世封而鄭公不然豈復之者未得其道耶殆議者不達先王之法耶今國家蒞視漢唐苟簡之政無小無大必師成周顧此三者法之大要為今之務在所宜講諸君究明其術蓋有日矣試述先王之時所以用之得其利漢唐之世所以復之非其道若

孔融肉刑之議鄭公封建之論皆一時之偉人必有可觀其悉陳之母有所畧有司將以獻焉

問宅都

問蓋聞堯有冀方舜都蒲阪禹宅安邑成湯居亳咸因起兵之地體國經野以統諸夏至於周公相成王成文武之業然後占星測景考天地之中作洛邑以會諸侯俾朝覲貢賦四方遠近道里均一當風雨之所會得陰陽之所和極制作之美以盡帝王之能事考之前世未

之有聞施之方來無以或加何則集累聖而大成監二
代以損益人文帝制於是乎備故也恭惟朝廷繼志述
事敦古善今法無遠而不陳物雖微而有制刑政具舉
禮樂修明郁郁乎成周之隆也營洛之盛宜復見於今
日況藝祖之豐沛章聖所駐蹕關河自若城闕孔修生
齒繁滋田疇墾闢六飛順動翠華時巡三朝令辰臨
御太極以覲羣后玉帛在列圖籍克庭一人高拱以宅
中四海駿奔而面內遂前人之美意觀乃聖之景光豈

不偉哉諸君承樂育之德久矣盍考周之典度今之宜
增新補遺務適其中以俟上帝之採擇焉

問鹽鐵

問鹽鐵之材民並用之其來久矣自管氏銖量寸計而
齊用富強後之言利者必以為稱首由西漢以來或弛
或禁不常其法而經制之方未盡善美弛之則利歸豪
右威去公朝而下有胸郤吳漢之強權之則民失其利
器多苦窳而上有卜式仲舒之議然則山海之藏必在

所禁而弘羊之術未易推行今國家制鹽之法既致其
詳天下奉行為效已久而冶鐵之利尚在所畧議者謂
其材可以上佐大農之調度下通百姓之器用宜有制
作以究其利此治古之所當行而當世之所宜講者也
然謀安宅者務厚下談王道者賤霸圖利雖足以富國
而術未便於百姓者主上之所不為功雖足以蓋世而
道或詭於先王者朝廷之所不取為今之議必取散之
而上不失權利之重收之而下無受其敝者然後可以

稱興造之意而在所行也諸君講前世已行之事考當
今時措之宜熟矣何施而可以興於此乎蓋三王之盛
時所以馭山海之利者宜有良法可考而行管子以來
興利之士計議之臣其所以措置施設之方辯析利害
之說多矣必有當否在所去取幸詳言之

欽定四庫全書

雲溪居士集卷二十八

宋 華鎮 撰

記 七首

杭州西湖李氏果育齋記

夫流而為江河蒸而為雲雨經乎中國放乎四海者水
之為物也方其出於懸崖仄石之下則乘航之力韜乎
濫觴之小不測之勢藏乎一勺之多雖魚蝦萍藻未或
有所容焉又況生蛟龍殖貨財者乎非其材之微而不

能與於此也沈涵韜晦所以養其源而已蓋其源大則其流廣乃若未能盈科而驟以行險者適足以喪其源也人之成性也如是故易以山下出泉之象謂之蒙而繫以辭曰君子以果行育德蓋以蒙果行則行無不周以蒙育德則德無不崇德成於內而行成於外者卷而懷之以獨善其身孔孟之疇也發為事業以致君澤民禹稷之徒也舒卷在我而觀時察變以應之而已何所施而不可哉亦猶原泉渾渾可東可西可曲可直而卒

不失其至於海也吾友季重家西湖之上依山結廬石崖如壁屹當書館寒泉一脈旁出其下昔人命之曰蒙泉余因登其門酌泉味其所以命之之旨進而目其室為果育齋庶幾居者仰以視其榜俯以鑒其淵而朝夕之間以是存其心而養其性亦以成昔人之志也

廣利侯廟記

廣利侯自東漢時發跡於會稽郡之上虞縣蘓旱救滂祈福穰災德施於人久矣雖以時祭祀而邑人報施之

心猶有未慊皇宋熙寧七年十一月天子郊見上帝澤
覃幽明有善必旌無文咸秩邑人沈文亮等迺論列侯
之功德上告於縣本縣尉權縣事張某遂聞於郡郡守
張某乃薦之朝廷粵明年七月勅封今號邑人沈粟等
詣郡請記其事郡守大資政趙公遂為之文知縣事方
某并以其勅刊於石主簿施某書丹市易闕某題額工
石之費則本州都知兵馬使黃謚因衆心而募成之以
今年七月十二日建於廟庭謹書其始末以詔於後時

元豐元年五月望日會稽華某題

温州永嘉鹽場頤軒記

余元祐丙寅五月來監永嘉郡之鹽場秋海風大至發倉庾館舍二年三月始得請於郡俾繕完之因以其餘治廳事之南舊屋三楹為小軒既成名之曰頤用易頤養之義也其屋南向背接虛室卑不至於下濕而墜茨足以待風雨門闌洞達疏牕虛明夏多好風冬有愛日有以養其天和左挾巨海羣山西來帶以飛泉縈以磴

道翠光紫霧潮汐之聲日在觀聽有以養其德性官無
二事而復一歲出納不過五六萬僻在閑冷賓客罕至
居暇日得優游於方策攷前世治亂興亡之本觀先民
出處去就之槩察鬼神變化之妙稽禮樂法度之制有
以養其道術月給之秩日給之廩仰充甘脆俯庇妻子
隨所多寡有以養其家人環蒔芳樹間以怪石因坎而
為池菱蓮生焉春華秋英赤白遞發綠篠媚水碧蘆繞
藩鳴鳩晴呼倉庚曉語清籟四起時如竽笙有以養其

耳目魚鱗香稻濁醪黃鷄無待城市山木之實水草之
滋終歲不乏有以養其口體懷才抱術須時而行者此
馬可以整轡放情雲壑不辭小官者此馬可以自適世
路多奇資祿以生者此馬可以糊口力困浩穰斷斷自
守者此馬可以卒歲彼致養之實雖殊而為名則一故
揭其名而題之若其實則居者隨所取而得矣暇日設
平榻其中列琴書於左右開黃卷接聖賢之雅言叩朱
絃得太古之淳音倦則起而徘徊於庭散髮曳履濶視

廣聽挹山海之勝酌風月之秀攬朝華之流芳弄漪漣
之游鱗杳然自放於埃壙之外曾不知歲月云邁齒髮
將改跡與世疏情與世濶因述為名之意并以其所值
書之斯言也雖不可陳於經世之君子前傖乎野人俯
仰之間疑若未有所愧元祐丁卯中元日雲溪山客記

道州錄事廳適齋記

元祐壬申歲余來為營道郡督郵越明年冬十月葺
舍館之西頽廡設戶牖以為室既成目之為適齋客有

過而疑之曰吾聞適當也物有當於心而無迕於意為
適若夫資雅材抱道術以遊乎可用之世行既久而步
不進日向晚而道則遠主郡簿書於放逐傲人之地俛
眉高拱與衆進退庭下捷步不異胥史組綬不足以為
六尺之華廩稍不足以飽數口之腹續短裨簿鬪構椽
楠方有風雨飄濡之慮曾何物之有當而無迕也而謂
之適耶余起而應之曰客聞求廉氏之二子乎昔求氏
與廉氏同里閭也求氏家富而宦達日患失其所有而

務得無已終年戚戚以憂廉氏農圃也食其力僅免其
凍餒不羨涯分之外終年熙熙以遊若吾子之所謂則
高位厚祿金珠華屋為可適而卑官薄廩華圭之門青
綠之品為不可適已吾恐特未定也吾之所謂適者適
於己之謂也非適人之所適也人之所適者物也物不
足則有時而不適己之所適者道也道無往而不在則
己無入而不適世之道不足者視名位祿養車服室宇
之麗切切然以為己之所宜保而不得去茲其樂也乃

所以為苦歟人之所惡夫犴獄牢繫者謂其錮繫而不可去也今貴富之人無道以處之而累於物則高位厚祿華服美宇曾何異犴獄牢繫錮繫之地耶至於欣捧一檄折腰斗升所養在中浩然自得者曾不知卑飛之為勞數粒之為薄搶榆控地時止時行則其憂也乃所以為樂歟物之所貴乎春臺太牢者謂其賞心饜腹也今微賤之士有道以自居而忘於其所貴則卑官薄廩圭華之門青綠之品曾何異於春臺太牢饜賞之所耶

若然則世之所謂適者果在己不在物而吾之為適齋不妄言畢容慚而退

高郵縣尉廳芭蕉軒記

昔有東南野叟旅寓於大江之陽長淮之陰居室戶南北方數步治平如砥一物不載惟植芭蕉柔芳藂生清陰密合或朝陽未升夕照俄景啜菽既飫塵紛不起時則策杖曳履逍遙乎其下伊洛豪士過而見之踵門而告野叟曰噫嘻乎叟之為人何鄙陋褊迫之甚耶且人

生而耳好和聲目悅美色口甘珍味體便安佚天之性也今叟既不構沉水之材列山藻之飾塗丹於楹粉椒於壁以為廣居便其四支又不能水窮海物陸搜山珍前列方丈庖遺萬金以為飲食養其氣體懈谷昭華雲和綠綺綿駒韓娥回波激楚不在左右娛樂其耳今有隙地數步何不取百金於洛浦遷餘容於漆洧培以膏壤甃以翠珉繚以丹楹覆以紺綸青陽欲暮煦日遲遲柳綿盡而綠陰重黃鳥轉而巧言微於是時也竒萼間

出異色雜呈粲若錦繡煥若明星輝映戶牖凌厲雲月
豈不悅目而明視乎何獨植此野卉嘈雜翳蒼費天地
長養之氣虛雨露沾濡之澤叟乃挹豪士而應之曰子
獨不聞夫鏤篋朱紘乎施於天子以為美管氏服之君
子不取非其稱也僕非伐冰無垂紫之位祿不過代耕
居不過環堵若乃強亡以為有恥約而慕泰竭一朝之
養以資奢麗之玩何異乎抱甕灌畦假修太古穿穴渾
混強生聰明無乃取笑於達觀之士乎子特見夫芭蕉

蕃生人間所至皆有無美色以回少年之目無甘實以
悅俗人之口故心輕而目不視焉殆未聞其善歟請試
道之夫秋露初冷霜華未零百物猶長先收其英則有
似乎大雅所云明哲見幾而辨早也層冰結海密雪封
屋庶草朽憊其心不死則有似乎常德之君子困而不
失其所亨也嶺梅纔芳江柳未黃靈苗緒抽先物而出
則有似乎機神圓邁復德不遠而居比在先者也雷霆
鼓物他無可覩一遇震驚此獨頓茂則有似乎好善之

士從善如流而漸摩易入也理疎而柔若不能立而修
榦特起高出牆屋葉廣而薄宜易以敝而夏日流金扶
疎自若花凝甘露味超楚醴體溢芳津稠於蘭膏可以
鑠癰疣之釁益如雲之鬢淮夷象齒膩滋而色漬隋侯
夜光塵凝而彩晦得其津而澤則潔素晶瑩若蚌胎新
剖象齟初脫齊紈魯縞吳越之綾膚受而不潔焚其苗
而滌之則色邁春雲光亂秋月猶始離於杼軸則芭蕉
之為物非特本支昂昂出乎其類而且有善可述材適

於用又沉蕃枝旁午綠影重疊秋陽晝時如翠帟高張
不漏可畏之色凱風颭至則動搖上下若青鸞聞韶曳
尾而鼓舞自春徂秋數月之間僕有其得而自適焉至
乎歲律將改瑾戶而室處此則退藏於厚地不蔽我愛
日負暄無礙計其所長與子之春花遠無十日之觀近
無一介之用其可同日而語乎子其默矣無汨吾聽豪
士聞之舌閣於齒而不得下涎流於頤而不得收赭然色
喪惕然氣奪逡巡而退余小齋之前先植芭蕉數本得

斯言而說之因目其齋為芭蕉軒記其言於壁云

越州修住宅靈籤記

予卜居會稽山陰之東均里九年當紹聖戊寅歲西鄰
嚴氏弗安其居來質於予家五月二十有七日除闢牆
垣合以為一工有鋤者得竹簡於始斲之下漆塗如新
筆畫無缺就而閱之則道家施真君第七籤其詞曰鬱
爾紫雲興便來覆我家勿憂門不盛致之五馬車籤雖
人為非俗居所有世所崇奉不應置之土中適在始事

之地一發而得之殆非偶然疑出神貺永惟詞旨稟曰
吉祥及茲營繕之初告以方來之慶顧在涼淺曷以感
格惟祖惟父惟我先世德善累積功利陰崇澤流子孫
施於苗裔庶幾由茲克振其緒遠踵前武以闡厥戶惟
華氏其先蓋出於微子開國於宋更八世至戴公考父
食采於華子孫以邑為氏世為宋卿士周衰散於四方
寄在北以舍人從高祖起薛封朝陽侯無害在南為越
將從高祖入漢封絳陽侯孝宣世龍以文章與王褒之

徒備侍從曹魏承漢歆位相國安樂鄉侯子孫相承更
兩晉為世家其後或仕或隱數百年間未有達者豈物
不終否窮則變通陰陽有符期會斯在歟何靈真之誥
旨與事契明切若此之甚也謹囊以紫綃襲以重綿閱
諸鈿匣寘於神所夙夜薰燭祇奉靈貺於戲惟天無親
惟善是祐禍福靡常其來象德若子若孫逮於後昆勤
之敬之無怠為善以成天顯無忽為不善以辱神休時
皇宋七葉元符紀元歲在己卯孟冬之月十有九日宣

德郎知通州海門縣管勾勸農公事兼兵馬監押華某
記

新安縣威顯靈霈公受命廟記

皇帝御寓格于神天動植蒙體百靈受職無善不錄有
功必知明洽萬邦覃及幽晦四年癸未詔天下州縣長
吏山川鬼神在典秩者飾完廟貌潔嚴祀事若禱祈有
感方策無文者悉以名上將加爵號德施甚厚河南府
新安縣隋上柱國韓莊公墳祠久列典祀不有休應福

茲邦人多歷年所是歲春暘為沴農圃望雲奉議郎知
縣事呂希復親禱祠下應如所期歲用登稔上之留府
祈達於朝庶沾王靈以答神貺方剡奏牘會逢詔書封
章既聞遂獲俞旨太常初以顯應進擬特沐綸言更錫
茲號鴻名懿實當而無遺六年乙酉自正月不雨至於
三月承議郎知縣事華某周視境內靡不致虔惟饗公
之旦悠然四作焚幣之際如絲載霏凝陰不舒三日而
雨霑足之貺敏於影響見者聞者起敬起愛罔不思報

爰列事狀請加旌封留府計臺閔實以上廼頒綸綍廼
錫茆土數極九命位冠五等綾牋錦襪金華貝軸致嚴
盡飾寵備時制命下之日通邑驩呼實七年丙戌仲春
旬有四日翌日備威儀奉引具三酌之禮告獻廟庭遂
襲以重藻扃以文函藏於縣宇於戲山川勝地二嶠鄰
封南望微山北據青要東聯九坂西峙闕門澗穀流其
前龍淵躍其左紫翠環合清光交飛龍犇而虎馳金鳴
而玉漱佳麗之會靈明攸依是宜神遊遐方千里來饗

福厚故國晨夕薦馨歷年滋多施澤益茂爰及明世薦
沐優恩俾竹素增華流芳彌遠偉矣邑人來請願刊翠
珉贊述龍光昭示萬世用既其實以慰厥心崇寧五年
歲在丙戌九月二十有五日常議郎知河南府新安縣
管勾學事管勾勸農公事兼管勾竹園司賜緋魚袋會
稽華某記

欽定四庫全書

雲溪居士集卷二十九

宋 華鎮 撰

銘 一首

清寧臺銘

按臺在新安縣

萬物並生惟人則靈發慮經世潛機在形世慮紛錯體
之貴清天機赴感用之貴寧惟清惟寧萬福之庭天道
昭昭地道冥冥不失其一動靜有經登茲歷覽可書可

銘

序二首

送新江東提舉常平張朝散序

某啟伏審提舉朝散光膺明命就易使臺伏惟驩慶某嘗謂野人有百畝之地歲時鹵莽以為食終日無事而耄稚有饑色芟夷芸耔蓄泄浸溉盡地之力而取之雖雜然經營奴隸告勤終歲充給而上下欣適夫百畝之地未多夫一家之用至鮮不加意則乏匱一致力則有餘天下大物也邦國至計也惡有漫不顧省而能保安

榮者哉古之稱無為而治者堯舜也考之經堯舜之政
上規日星下撫鳥獸微及草木旁臻四夷誅凶人平涿
水禮樂法度紀綱具舉無為乎仲康作而復夏三宗勤
而續商宣王修攘周室斯起施及唐漢之世雖術有粹
駁業有小大至其有為則隆情棄則汙莫不相似可指
宋以數先皇帝奮然修文武之政功未既而橫議勝天
誘勇智振起其緒以幸天下搜英抉竒相與周旋而濟
之此志士感奮摠發蘊蓄之秋已嗟乎庸夫常愧於乏

才高才多困於時會明公以競爽之資挾練達之術方
明天子修復治經首當選掄綱領一路將見發揮餘緒
潤色大猷使跂僂之氓實授其澤彼畫繡朱履高車于
門皇皇其華照映鄉黨不足為明公道方益懋明德而
就丕績充一路之成以膏潤四海是行也何其偉歟聞
之者莫不欣藏噐之妬時善經世之得賢而為蒼生賀
其雖不敏嘗竊私門下之恩此心所言之不能自己
既序其事又從而為之歌曰湘天之遙日則昭昭湘水

之遠其流坦坦桂之楫兮蘭舟錦為席兮濟中流鉦鼓
疊疊兮旌旗靡靡蛟龍之遠兮鸛鷺之邇

方時發尚書索至序

按方時發尚書名數索至序畧曰此編舊出於賢闕

又曰余自潮歸隱溫舊書惟此編江廣罕得其傳由是載加考訂付之剞劂鎮此序亦云比闕賢闕諸公取書中應該名數者夷考意指名曰索至則是書非時發所著特經時發重訂而刻之耳然鎮亦云謹鏤諸版以遺同志而不言及時發或鎮與時發同任鐫刻之事抑時發已刻於前鎮復為重梓耶是書著錄于菴竹堂書目題曰無名氏經義考云未見蓋亦不傳矣謹附志於此

五經皆聖人之言獨書所載者帝王之事渾渾而全灝
灝而明噩噩而察虞夏商周所以垂訓幾無餘蘊後世
學者持書以道事之說遂謂書不過語語不過事烏知
事本于道道散于事謂之事者無非道也嘗試稽五十
八篇若二典若禹貢若洪範雖史筆紀出治之事今求
其極是數篇蓋天地陰陽之妙道德性命之蹟尤所難
知童心罔覺白首紛如類多有之其餘謨訓誥命言皆
詣理理皆寓數苟非研精究微斷以遠識孰能即倫類

而通其義乎比閱賢闕諸公雞窓之下取書中應該名
數者夷考意指綴緝事證目曰索至余觀其析理摘要
辯疑釋惑平日所以用心固非淺學之比况又採黃卷
之至言取時儒之成說旁搜遠紹具載無遺即此以求
書之事即事以求書之道豈不猶操刀以經肯綮大觚
將見迎刃而解矣謹鏤諸板以遺同志庶資討論之益
云

引一首

雲房引

太虛之中有物焉萃天一之精為正北方之氣觸堅石貫驚瀾出乎喬嶽之層巔通川之涇隈以上薄乎無窮而行無盡昔之人視其油然而作也即其容而強為名曰雲雲之異者有粲然發青紫之華凝空干呂以表其人而動殊俗者也有離枝比葉如金如玉重輕濃淡近類烟霧而為世瑞應者也行乎四時周乎旦夕呼吸萬變彌覆絃野混合天宇同為一色挾應龍擁雷風飛雲

窮臘霈雨炎夏兆樂歲之協氣蘇既槁之旱苗雖春晝
閒飛夏月散起飄若羣鶴結為竒峯人亦好觀有見稱
述彼乘天地之機因陰陽之會合散消息偶與物值利
者利之美者美之而雲曾莫知已然出而忘歸密而不
雨浮游片斷固結重陰蔽日月之大明點太清之虛碧
世斯惡之指以為醜夫無心者情無自而生無情者用
無自而作情心兩寂則趣舍雖在而恩怨可消若夫雲
天地山川之氣也可謂真無心者一與物際則愛惡之

變交至而況於人乎況於有心乎余在蒼梧多雲物其
態朝暮見既累月會新舍館之西顏廡戶牖之以為房
引其說而為名元祐癸酉十月望日

題後一首

題鄭石二詩後

鄭都官石學士二集得之治平甲辰歲越十有七年至
元豐庚申以糊力解脫因加裝標遂并為一帙又二十
有二年建中靖國改元之初歲在辛巳再綴緝之二公

雖皆長于詩者然而格調非類第以編簡不廣懼有散失故以相附耳中元日會稽華安仁題

說 三首

命諸子名字說

按鎮子有初平初成二人又有季壬見鎮元豐六年季壬生詩

而此說列克明克從克勤克儉四子之名而不
及初平初成季壬疑其說當為他人作然原本
直題曰命諸子或平成壬之外復有此四子抑
四子之中有平成壬原名後復更名耶均無所

考附識
於此

大學曰知所先後則近道矣克明峻德者道之所先也

父子有親君臣有義夫婦有別長幼有序朋友有信謂
之人倫能從五典之教然後不失其倫矣傳曰人生在
勤勤則不匱然耕也餒在其中矣學也祿在其中矣勤
於財者不若勤于道也董子曰儉非聖人之中制故與
其奢也寧儉與其不遜也寧固儉固美矣然聖人之所
寧也克明可字之以彥先克從可字之以彥倫克勤可
字之以彥道克儉可字之以彥寧

研說

世言丁晉公嗜竒玩而善蒐致思得端溪石硯取朝士之博雅者上為守將延之館第燕語周密與之論研石材盡出所藏以示之守已愕眙歎其精絕公曰此常材不足錄願因使君獲彼竒寶黃金五十以為市致之資守受辭而行駭不知所出至郡盡集研工俾道其聞閱百餘輩皆碌碌常談無足采者最後一老匠逡巡不言若有所待引而叩之乃曰研石之美衆工言之詳矣使君猶以為未必得子石而後可然子石竒材也未易驟

致致之有術非衆人之所知請試求之庶或有得第多聚溪石聚於曠地當就擇焉用其言得石幾萬枚工乃結巢石傍寢處其上越三日欣然告于守曰得之矣請分其石為三聚更三日輒去其二以其一復三分之其後率三日又去其二留其一以為三聚如是久之所遺纔三枚乃於昧爽之間晏陰之際引守就視其一蔚蔚然有雲氣出其上剖之得圓石徑數寸析為二研稹如玉堅而不頑潤澤之氣藹然常在此真所謂雲根也致

其一於晉公其一守自保之參政蘇公文房四譜有子
研雲端州石研匠識巖之文理乃鑿之五七里有一窟
自然有圓石青紫色琢之為研故謂之子石研所言雖
小異而端溪之石有子為研材則不誣矣

權說

權衡度量先王制之以平物天下所賴至今信然執度者
約之則分寸不差操量者概之則龠合不失權衡二物
或異於此權之所措動與物鈞不勞進退而重輕立辨

者常少惟指不違心進退有節者能之嘗過市見持權於肆者物仰而權俯則知其為輕于是乎引其權而進之進之已甚向之仰者乃變而為俯矣既俯而權仰則知其所重於是乎抑其權而退之退之已甚向之俯者又變而為仰矣一進一退或仰或俯至有移日而不能平銖兩之物者豈權衡之制未善哉豈心智之識未明乎則亦指掌之用無節故退而思之乃為變法救弊之說天下有二弊不失之寬則失之猛濟寬者莫如猛救

猛者莫如寬寬猛仁義之用皆先王之道然濟寬以猛者或弊於刻核救猛以寬者或弊於縱弛何則制法在君而行法在臣者人主固知弊之所在而寬猛時用各有攸趣矣推行之吏意或不然近臣希望風旨遠方迎合朝廷郡縣趨向監統上下風靡彌遠彌甚勅法則洗垢索瘢慎罰則輕釋有罪理財則錐刀必取厚下則國用不慮問其縱弛則曰朝廷方務寬厚問其刻核則曰朝廷方務謹嚴不知謹嚴不在于刻核寬厚不在於縱

弛至於刻核縱弛過于已甚而害治失寬厚謹嚴之意
終不足以相濟是何異于向之持權者乎此無它殉利
而不由道務承望以徼倖一切也余懼承望之傷義次
其言為權說以自警云

傳一首

越州跛鼈先生趙萬宗傳

嘗覽載籍見前修之言會稽佳山水為勝絕故地靈氣
殊而珍財寶貨異人佳士多所由出暇日登高探深俯

仰巖壑之勝千里之內清光秀氣冲融靡漫濃浩可翦
雖春夏秋冬朝暮晦明之變千狀萬態而異趣同美信
佳麗之會也自鴟夷悟藏弓之漸遠烏喙之害奮擊雲
表而後藏器待時高絕邁往之士代有作者故曼倩浪
遊于方伎子真鴻飛于廛市嚴陵陸沈于絲緡梁鴻淵
嘿于春杵鄭公遵養于樵風逸少高舉于蘭渚謝傳韜
光于東山安道采真于了水玄度慕永興之勝稚圭尚
蛙鳴之美迫乎季真鑒止足之分脫塵土而登希夷千

載之間流風遺韻絲絲不絕是後幾三百年得先生而不顯于世先生姓趙氏名萬宗字仲淵會稽山陰人也少惇敏錢忠懿器之入朝欲與之俱以親老辭不行既長博極書傳負經濟之術用進士應詔籍春官氏資素蕭散涉世故淡如也家累千金委季氏一切不問壯歲築室居南鎮右瞰平湖前挹秦望蕙帳素几以居畜一鶴號丹砂引以為侶足跡不及于高門鼓琴讀書怡然自適者三十餘年祥符中詔舉遺逸郡守兵部外郎康

戢薦之曰趙萬宗年六十二潔而能峻直哉惟和雜居
丘園之中獨得鄉曲之譽論其德行則可以訓俗富其
文辭則可以教人而能息心榮祿委跡衡茅若招以弓
旌賁之束帛非止懦夫立素抑亦廉士歸風知而不舉
則臣獲蔽善之譏舉而無徵則臣負欺天之咎既被召
則曰吾老矣不足以任事求與赤松子遊因獻跛鼈傳
以自見有詔即其家賜羽服後十餘年而終家君先生
之外孫也逮事之家君言先生神宇秀徹識度夷曠終

日凝淡若嬰兒真方外之士然取舍去就之際則確乎有不可奪者善八分草隸書通俞扁之術或辟穀導氣嘗為詩曰斗懸金印心難動屏列春山眼暫開豈其志也歟所謂跛鼈傳者其音大抵言古先帝王自堯舜以來至于五代所以理亂興亡之迹終設問以自喻謂能言之而莫之致犹跛鼈然故以名其書觀其書始直有意于世天命不相卷以自牧殆非山林枯槁繫而不食者也嗟乎造物者之于物也或始厚而終薄或始薄而

終厚果有情也耶果無情也耶其于先生也與之以其道與之以其時似也然不使之乘其時載其道于天下卒以窮居終又何薄耶故殆直而推之曲而任之亦不知其所以然而然耶昔荀卿有言登高而招臂非加長而見者遠順風而呼聲非加疾而聞者彰賀公以官賓之貴由禁闥歸故鄉是以當時稱其賢後世高其風華藻芬芳熏灼宇宙彌久彌著先生之地異于賀公顧德實嗣之而名不彰是知潛德幽光委翳于下猶良玉在

璞駮驥倚翰非遇高明之士惡能自致于青雲哉先生
之亡未六十年邦人長老尚及見之猶能道其畧然系
緒弗續鄉評浸遠將無以表于後世故論次之庶幾先
生之名靡或云亡會稽之士素風不墜元祐元年正月
日會稽華某傳

題趙先生傳後

附錄

傅崧卿

華僊民出其先大夫所撰趙先生傳示崧卿先生名
萬宗字仲淵當五季之亂生會稽弱冠為錢忠懿王

俶所器藝祖受天命忠懿籍封內十有四州之地若
其民數獻諸朝先生始為王民嘗以進士貢禮部後
更太宗真宗天下益治修古禮文之事祀汾陰封泰
山先生時年甫六十餘氣力壯彊州舉遺逸詔書召
先生辭不赴獨持所著跋鬘書上之且請自託於道
家者流朝廷不奪其志賜以道士服終於家嗚呼先
生生亂世幸不死遭時承平以才行見推州郡可以
仕矣而卒不仕豈其言落落難合或者誠有得於黃

帝老氏之學葆其光而不耀者耶僂民要予賦詩謹
為賦二絕句

生長兵間接太平封巒親見告功成茂陵遺橐猶施
用跛鼈如何獨未行

鶴書東召竟字辭一去騎鯨世莫追會有丹青遺像

在誰將配食季真祠

按傳後二詩原本不著姓名考
寶慶會稽志載其第二首題傳

崧卿作本序亦云華僂民出其先大夫所撰趙先生
傳示崧卿則為傳作無疑今補書其名於題下崧卿
字子駿山陰人政和五年進士官給事中嘗評鎮會
稽覽古詩有云詞格清麗寄興深遠足以垂觀來者

墓誌銘 一首

黃子受墓誌銘

君姓黃諱鑑字子受其先剡人也移籍會稽家于大雲里至君始三世矣曾祖諱仁福祖諱承霸父諱瑀君初娶李氏前二十有七年卒生男一人曰景仁女一人既有家而卒繼室史氏生四男子曰孝先孝達孝能孝述孫男五人曰寅察宏寵宙君幼以端敏見器曾大父早被付託因前人之業無所改造生七十有九年足跡未

嘗踰州里之闕而所致彌裕華屋大開鮮車美服飲甘
茹珍便習在馭予以養老長幼俯仰皆得而為越之富
室子孫誥誥進止成列壯強司產幼茂服儒博帶綦冠
左右就養長者車轍時及其戶燕有完美幾二十年蓋
其所以致之亦必有道昔先王釐天下之民為四付以
分職弗怠弗越皆足以要羨盈而底豐裕後世維馭縱
弛人散而殉其私情者狃於宴安不克自利以失其時
利夸者好大喜遠不恬分守以喪其本資故家有而饒

足者稀不勞而久固者鮮君其得先民之遺風能自力而恬守者歟黃氏世有達人若憲之識量香之篤行霸之吏事祖之雄才稱載前史咸有遠過於人者君豈其苗裔耶何不學而德性之懿近古也紹聖三年歲在丙子十二月初四日庚申君以疾卒于家期年之日甲申葬于會稽縣五雲鄉之漁義嶼既得卜其孫察狀君之裔事來蘄銘君之長子與余僚亞也故為之銘曰雲山之麓雲溪之源有吉宅兆良士攸安在君成家弗後弗

行
一
人
二
一
之
卷二十九

跂積之斯光茲安以俟

欽定四庫全書

雲溪居士集卷三十

宋 華鎮 撰

祭文 十五首

代高郵縣祭先師究國公文二首

先聖之道著如日星萬世莫不尊親者豈惟其道之高
明抑亦諸子輔佑之功也見而知之有功于先聖者莫
如公聞而知之有功于先聖者莫醇如孟子荀况揚雄
韓愈皆宗師之國家求善不倦紀功無遺推存及亡遠

追先哲比尊孟子以上公之號分社于鄒配享于先聖列
位于公下復俾荀况食蘭陵揚雄食成都韓愈食昌黎
皆加以三等之爵從祀于先賢某肅承詔條將塑繪其
象謹以元日祭告于廟廷惟公聰明歆國休命尚饗

昔尼父修文武之道于鄒魯天下之士心悅誠服而來
學者三千餘人孝若子騫辨若子貢勇若子路文若子
夏皆當世豪傑也莫不推公之賢服公之德先聖所與
亦惟在公具體聖人交臂儒術功扶名教澤流後來故

能存契行藏沒同薦享皇帝初修郊配誕布鴻休咸秩
無文矧伊常祀式嚴詔旨敬款祠宮惟公有神歆我國
命

新安縣祭威顯廟靈霈公文

惟公粹稟天英挺生人傑存都撫仕沒為明神歷載滋
多炳靈彌仰攝雨暘之妙用福桑梓之舊邦有感必通
其應如響靈休累洽嘉譽升聞極九命之崇資秩萬年
之典祀威顯錫號嘗稽疇日之英雄靈霈進封更表自

今之德澤某躬賫綸綍祇薦几筵上嚴天子之休下適邦人之願惟公振揚精爽膺受龍光等天地之久長為民社之依賴尚饗

新安罷任辭廟文

某徃被宸綸來司邑事百里之內二年于茲時和歲豐民安物阜私門綏靖公府清夷不愆于期以禮受代皆神之賜為德甚隆今倣裝在途離邑有日敢嚴薄禮祇詣靈祠式謝乃休并告其去尚饗

代高郵縣祈雨祭諸廟文

惟神旱乾水溢天實為之雖有良農無所致力欽惟明
神克殄時患高郵下澤水田萬井踰月不雨溝塍皆涸
吏民嗻嗻赴愬無地惟神降靈邑有祠宇歆此血食豈
忘我民敢致恪恭仰俟降格時霈甘雨俾民有秋尚饗

代高郵縣祈雨祭齊淵聖公文

惟公今以時雨愆期水泉涸竭仲夏之月農功弗施境
有明神敢急精禱惟公昔在周末一匡天下尊隆王室

今茲小邑廟貌所在一雨之賜寧或惜之敢罄乃誠仰俟靈貺尚饗

代高郵縣祈晴祭東嶽文

某永惟三農之功下資政事上恃雨暘不愆不謬乃克有成某自被命來尹茲邑農之政事不敢不勉今麥田告成霖潦為沴縣令之力無所致巧惟用迺誠祈于明神冀回時暘俾民有秋惟神奠位東方尊冠五帝迺神迺聖與天齊功雨暘之權實在掌握謹與僚吏躬款靈

宇庶資菲薄昭格休貺尚饗

海門縣祭龍王文二首

惟王潛升自得運用無方媿四極以分都奄百谷以居
長序臨長夏日在初蠲式展彝章欽修祀事剛鬣既膺
柔毛則肥蔬核允時酒醴維旨凡此有造罔或不虔庶
致微誠上闕昭鑒伏願風濤妥息雨暘叙時隄防固完
水泉安宅人無汎溢之警歲享豐穰之休伏惟尚饗

又

惟王每歲上春興土功備水潦簡書所載令之職也今
茲興事奉修故實惟神宅靈重淵當此漕路河防保固
默賴神休役事之初祇款祠宇庶格靈貺相我功夫尚
饗

代淮南運使到任謁諸廟文

某肅將王命來總計臺視事云初敬修有典備儀物以
雖菲款祠宇以惟寅仰冀明神默歆精意尚饗

祭高郵縣中書孫舍人文

惟靈其昔初任在公之里時公燕閒識公眉宇淡然往
還相與如水南北一別寒暑八遷門闌邈矣音問缺然
幾至相忘如江湖間某進選曹公在西掖見公言貌不
異疇昔矜某蹭蹬勞公剪拂伊何人斯不厚分義孰視
其困忍不見譽公鄙其為形於辭氣朝堂之上慷慨與
言俾其心愧拱手汗顏倉黃出力為之羽翰乃知大人
惟義惟忠然否之際踈戚不容矯然持操古之遺風巖
巖太山介如其守干將鎔錙不可矯揉妍媸必分寧晦

塵垢念此寒鄙自公吹噓每思奮勵庶酌眷私公既去
逝知復奚為出不餞行葬不執紼愧此匏繫歲月忽忽
豈惟宿草隴木是密翰墨長在緒言莫祈隻雞綿酒昔
有成規未或鄙絕歆此菲儀尚饗

代道州祭九疑帝舜文

皇帝嗣位初郊昊天禮洽百神慶覃四表凡載典祀罔
有弗欽矧惟潛德升聞粵帝甚盛盡善盡美惟時惟幾
功茂百王名高四代陵寢攸在威神所依祇若詔書敬

修祀事惟帝降格歆國之馨尚饗

代道州祭鄒國公文

惟公三代而下道散法亡橫目之民不放於被髮左衽
越數百世聖人有作堯舜之道復隆文武之法不墜今
天下去古雖遠炳然與三代同風二帝共貫者孔子之
道不息而儒術有傳也闢揚墨之邪說消處士之橫議
使孔子之道著而後世不失其歸者惟公之功故昭配
孔庭分茅邾國皇帝初款八陞大霈萬方凡曰有功咸

舉典祀敬敷昭旨恭薦嘉誠惟公有神歆國之德尚饗
祭温州張判官文

惟靈標瓊璫以為質兮挾青萍之星鉞牽執圃之薜華
兮倚道山之豫章秀榮綴於靈芝兮高價增於阿房撫
脩翮以自戢兮方卑飛而未翔蘭則發夫幽芬兮天曷
為之早霜躡鸞影以俱逝兮合桐陰而併傷嗟造化之
推移兮或厚薄而靡常既有壽之不究兮胡器業之允
臧粵予步之蹇蹕兮適公遊之彷徨展傾蓋之靡素兮

曾非白首之所量
顧良樂之在馭
分將觀要津之騰驤
何白雲之難期
分奄言還乎帝鄉
鼓鳴鐸於江臯
分抗丹旄於歸艗
惟效職之有地
分悵靈輻之莫將
喬酒之約雖無
分徐雞之禮所當引
慨歎於北風
分託菲薄於椒漿
尚饗

--	--	--	--	--	--	--	--	--

附錄行狀

惟華氏其先蓋出於禹二十九世微子歸周開國于宋
又八世至于戴公考父食采於華子孫以邑為氏世為
宋卿仕兩漢魏晉爰及江左遂為世家其後或仕或隱
數百年間未有顯者至先君復以儒術有家經史諸子
與夫陰陽方技之書罔不口誦心維未始須臾廢也及
登仕版頗有經世志元豐未嘗獻所業于朝名試太學
博士會草試法以奏舉中書舍人孫公國子祭酒豐公

即以先君應詔兩上不報先君平生亡所嗜好惟喜讀書至老不倦故能力攷前聖之微言深究昔賢之書畫發為文章諸體兼備雖詩與詞皆有典則非雅言不載也其書則真行草隸率盡其妙小篆尤工作吏州縣奉法循理以利澤民物為心不為竒以賈名故亡赫赫顯功而所至稱治糾曹營道平反居多賴以免於死者甚衆鳴絃洛邑化務愷悌嘉禾甘露皆致其瑞四隣五邑有蝗害稼而獨不至其境攷課為京西第一為郡漳南

政尚中和惠民以德馭吏以嚴革諸剝主者請託之弊
易之以公舉探籌而補期月之間州以大治然卒不得
乘其時行其道於天下識者咸惜其不偶而先君未嘗
以為意嗚呼先君已矣所可傳者惟文初成念欲鏤板
行于世每以奔馳薄官汨沒簿領未遑編綴比緣待次
里閭遂得哀集遺文躬自書校幾四十萬言離為百卷
儻非宗工鉅儒為之冠序曷以傳之不朽茲者幸會樞
密資政樓公來帥會稽敬以先君之文求序焉獲遂所

請昔柳公權唐之偉人也當時大臣之家碑誌非其筆
人以子孫為不孝今先君之文得樞密公為之序親染
翰墨光耀簡策垂之無窮而初成區區積年之志一旦
獲伸不特無媿於唐史臣之言而先君亦足少慰於地
下矣豈不幸哉謹并以揚子法言訓解一十卷書說三
卷會稽覽古詩一百三篇小詞一卷會稽錄一卷哀文
一卷鏤之于板以廣其傳焉紹興十三年癸亥九月望
日男右朝散郎新差監行在權貨務都茶場賜緋魚袋

初成謹書

跋

先君遺文有雲溪集一百卷揚子法言訓解一十卷書說三卷會稽覽古詩一百三篇長短句一卷會稽錄一卷并附見者哀文一卷定為一百一十有七卷孔子曰我欲託之空言不如載之行事之深切著明也先君富於藝能頗有經世志徒以不苟合世莫有知而用之者其間雖或用之亦不甚力要惟不能深知之故耳為郡

漳南未幾而沒嗚呼悲夫漳南所欲設施者且猶未盡而況生平之所欲耶求之行事固已不可多得所從託於不朽者惟空言而已今取世所通知者不過神功盛德詩頌書說嘗獻之先皇朝與夫會稽覽古詩近稍流布於士大夫者自餘方藏之篋中日月寢遠卷帙散漫其能免摩滅者幾希夙夜用懼柰何遺孤人地凡冗念非推借於名公鉅人則無以增重其價而鏗鉤震耀斯人之耳目屬者樞密大資樓公來帥會稽敬以遺文冠

序為請乃蒙矜從仰惟文章翰墨妙絕一時將令來者
失聲歎息誠不待披先君之文而先君之志可知也嗚
呼盛與樂道人之善非公殆不能與於此是用鏤版而
傳之然紙墨可具也其文四十餘萬言繕寫抑末也重
念弗躬弗親則無以稱平昔之勤而伸罔極之報者若
夫體制則初成不當言及已見於樞密公冠序矣至於
世系之遠近出處之前後則有墓狀云紹興十三年九
月旦日男右朝散郎新監行在權貨務都茶場賜緋魚

袋初成謹書

按寶慶會稽續志鎮子初平登大觀三年
第為太常博士靖康初卒此稱紹興十三

年云云以年考之距初平之死十有八年
矣是初成乃初平之弟而鎮之少子也

